



EDITORIAL

Pakusgon an hukbo han katawhan ha pag-ato ha pasismo han rehimen Marcos

Ha masunod nga mga bulan ngan tiarabot nga tuig, pursigido ngan sistematiko naton nga pahiluagon ngan pakusgon an Bagong Hukbong Bayan (BHB) komo armas han katawhan Pilipino ha pag-ato ha pasista nga paghahadi han rehimen US-Marcos. Atubangan han natikagrabang pananalumpigos ha katawhan, natikapintas nga pampulitika nga panmuyop ngan natikahaligot nga lugway para ha demokratiko nga pagpapahayag ngan paggios, nagtitikadako an panginahanglan nga hawanan an dalan han armado nga pakig-away.

Igin-imponer ni Marcos an diri deklarado nga balaud militar ha yukot nga mga baryo ha bug-os nga nasud agud puuhon an pag-ato han masa nga nagdedepensa ha ira kinabuhing pakabuhing. Ginbahagudalan han mga armado nga tropa ni Marcos an mapandabong ngan mapanhibang nga kumprador nga operasyon han mga korporasyon ha mina ngan mga plantasyon. Wala-tuo an mga kaso han panmatay, pananarhug, iligal nga pagaresto ngan panmriso kontra ha masa nga parag-uma ngan minoriya nga naninindugan nga naato.

Bisan ha kasyudaran, waray hunong an sarbeylans ngan pan-gigipit ha katawhan nga organisado nga nag-

dedepensa ha ira kaupayan. Ginpupuntirya ni Marcos, labina, an mga trabahador, mga baga-trabahador, mga kabatan-unan-estudyante ngan iba pa nga sektor nga nagkakaurusa ha katuyuanan nga ipasulong an mga demokratiko nga ungara. Ginpapaminagaw hira para puyupuyon an ira guliat agud pahitas-on an sweldo, pahimubon an presyo, disente nga trabaho, sadang nga badyet ha edukasyon ngan mga pankatilingban nga serbisyo.

Ha naglabay na nga masobra pito katuig, gatus-gatos kabilyon kapisos nga pondo han katawhan an ginbuhos ngan ginmalgastar han reaksyunaryo nga estado ha gerra han panmuyop ha pakig-away han katawhan para ha

nasyunal nga demokrasya. Maraut nga larang hini an perdihon an BHB komo armas han demokratiko nga poder han katawhan, ngan kahuman, puntirya ngan puyupuyon an organisado nga ranggo han katawhan. Ultimo nga katuyuanan hini an waray ulang nga makaghadi an reaksyunaryo nga poder ha nasud, ngan waray ulang nga makaghakin hin karikuhan ha pandabong ngan paniniyupi an mga imperyalista, dagko nga burgesya komprador ngan dagko nga agaron maytuna.

Bunga han pansakob nga mga pagsasayop nga hinungdan han nagin mga kaluyahan ha pag-atubang ha todo nga atake han kaaway, nahiagum hin seryoso nga kahibangan an magkalain-lain nga yunit han BHB. Napapanahon nga ginpanawagan han Partido an kagiusan nga pagtutul-id hadton katapusan han 2023 agud itul-id an naglabay nga mga pagsasayop ha pagpasulong han rebolusyunaryo nga kagiusan, kalakip an dirudilain nga as-

peto han gerra han katawhan, agud ibirik an hukbo han katawhan tikang ha pag-atras ngadto ha utro nga pag-abante.

Ha giya ngan inspirasyon han kagiusan nga pagtutul-id, nagpupursige an mga Pula nga mangaraway han BHB ha pagpasulong han panmaihaan nga gerra han katawhan. Pakyas an deklarado nga katuyuanan han rehimen US-Marcos nga rumkon an armado nga rebolusyon ha katapusan han naglabay nga tuig. Padayon yana an BHB ha pagpahiluag ngan pagpahilarum han base panmasa, ha pagpakusog han mga kontrapyudal ngan kontrapasista nga mga panmasa nga pakigbisog, ngan ha paglansar hin mga taktikal nga opensiba kontra ha mga lanong nga pasista nga tawuhan ni Marcos.

Ha pagpasulong han kagiusan nga pagtutul-id, kinahanglan mahugot nga pankatinnan han ngatanan nga kadre ngan rebolusyunaryo nga pwersa an armado nga pakig-away komo prinsipal nga porma han pakigbisog, samtang sekundaryo an dayag nga kagiusan masa ngan iba nga porma han pakigbisog, ha pagpatuman han sentral nga buruhaton nga ibagsak an bagakolonyal nga estado han mga burges komprador ngan agaron maytuna. Kinahanglan padig-unon han ngatanan nga kaapi han Partido an kaandaman

nga kumatin hin armas ngan umapi ha armado nga pakig-away.

Kinahanglan pursigido nga mag-
mot an mga rebolusyunaryo nga pwersa ha kasyudaran ha kumprehensibo nga pag-abante han armado nga pakig-away ha kabaryuhan. Hawanan naton an hiluag nga dalan para ha pagmartsa han waray kapareho nga ihap han mga trabahador, бага-
trabador, ngan petiburges nga intelektwal tikang ha kasyudaran o bisan ha langyaw nga labnasan, ngadto ha dalan han armado nga pakig-away. Kinahanglan han BHB hin mga kadre nga trabahador ngan intelektwal para magserbe nga mga Pula nga mangaraway, kumander ngan upisyal ha pulitika han BHB, samtang ginhahasog hini an dalan han utro nga pag-abante.

Para makab-ot ini, kinahanglan pursigido nga pahiluagon ngan pakusgon an kagiusan masa ha kasyudaran, ipasulong an mga panmasa nga pakigbisog, pakusgon an mga panmasa nga organisasyon kaupod an mga sikreto nga organisasyon masa ngan pahitason an rebolusyunaryo nga kapukawan han mga rebolusyunaryo nga pwersa ha kasyudaran.

Ha mando han Partido, bug-os nga tuig nga gin-aabre an mga integrasyon ngan pagrekrut ha hukbo han katawhan, labot pa ha kada mga anibersaryo

han Partido, BHB ngan NDFP. Andam an mga yunit han BHB nga kumarawat hin grupo-grupo han mga aktibista ngan kadre tikang ha kasyudaran agud mag-integreyt ha mga Pula nga mangaraway, magpailarum ha mga pagpahiaara ha pulitiko-militar, magpartisipar ha mga pag-aram, produksyon o pankultura nga aktibidad, magserbe ha masa nga parag-uma, magin dentista, medik o magturutdo han masa, makig-usa ha kontrapyudal nga kampanya, ngan mag-amot ha pagpundar han Pula nga poder han demokratiko nga gubyrno han katawhan.

Sugad nga mayda plano an mga sanga ngan seksyon han Partido ha kabaryuhan, kinahanglan magbug-os an mga komite ngan sanga han Partido ngan rebolusyunaryo nga panmasa nga organisasyon ha kasyudaran ngan poblasyon hin usa katuig nga plano agud aydon an grupo-grupo nga integrasyon o pag-api ha BHB.

Himuon an kampanya han pag-aram hiunong ha armado nga pakig-away komo prinsipal nga armas ha pag-ato ngan hiunong ha disiplina han BHB. Ipasamwak an pag-aram ha nagpapadayon nga kasaysayan han armado nga pag-ato han katawhan Pilipino para ha nasyunal nga katalwasan. Kumuha hin inspirasyon ha estorya han kinabuhi han mga rebolusyunaryo nga bayani, nga waray pagruhaduha nga naghalad han ira kabaltok ngan kinabuhi ha katawhan.

Kadungan hini, kinahanglan pakusgon an kampanya han pagrekawdar han ngatanan nga tipo han suport para ha BHB, tikang ha pinansya ngan pagkaon ngadto ha hukbo han katawhan, tubtub ha mga higamit ha gerra, hasta na ha pag-ataman ha mga nagpapatambal ngan nagpapa-huwas han sakit.

Kinahanglan padig-unon an hunahuna ngan lawas han mga kadre ngan aktibista nga mag-iintegreyt o hul-os nga maapi ha hukbo han katawhan, labina ha atubangan han buylo nga pasista nga pag-atake han kaaway. Sering ngani ni Mao, diri pyesta an rebolusyon. Kundi ha pagpanalipod han masa, kada adlaw kuntento an mga Pula nga mangaraway ha pag-ataman ngan paghigugma han masa.

 Tuig LVI Ihap 3 Pebrero 7, 2025	
Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles. Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.	
Gin-uunod Editorial: Pakusgon an hukbo han katawhan ha pag-ato ha pasismo han rehimen Marcos1 Kaso nga impeachment kan Sara Duterte3 Anibersaryo han Partido ha Cordillera4 Iginduduok han LAB an gerra han katawhan5 Kagiusan nga pagtutul-id ngan pakigsumpaki ha sayop6 Mga protesta7 Anibersaryo han PKP, iginlansar ha Rizal7 Ha dagmit nga pulong8 AI kontra ha trabahador nga Pilipino9 Pan-gigipit ha sektor han BPO, ginkundena9 Mga grabe nga pagtamas-tamas ha katungod10 Mga protesta para papagbatunon an Duterte-Marcos10	
An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas	
 ang.bayan@cpp.ph	

Ha duso han katawhan, *impeachment* kan Sara Duterte, ginsalawad dayon

Hadton Pebrero 5, nagpirma an diri mamenos ha 215 nga kongresista ha kaso nga *impeachment* o kaso kontra kan bise presidente Sara Duterte para patalsikon ini ha pwesto. Iginpadayon an kaso nga *impeachment* kontra kan Duterte kahuman han haros duha kabulan nga pagdelatar din-hi han rehimen Marcos. Ginpangunahan mismo han anak han presidente nga hi Sandro Marcos an pag-endorso ha ika-upat nga reklamo.

Ginsalawad an *impeachment* ha urhi nga adlaw han regular nga sesyon han kongreso. Antes hini, tulo nga reklamo han *impeachment* na an ginsalawad ha Kongreso. An ikaduha hini ginsalawad han mga progresibo nga organisasyon ngan indibidwal ngan igin-endorso han Koalisyon nga Makabayan.

Mayda pito nga artikulo an ikau-pat nga reklamo nga *impeachment*. Nangunguna hini an "pakigkunsabuhay para patayon hi Marcos, an iya asawa nga hi Liza Araneta ngan an House Speaker Martin Romualdez." Ginhimo ni Duterte an panarhug had-ton Nobyembre 23, 2024 ha butnga han pagbista han anomaliya ha pag-gastos niya han *confidential funds* nga gin-alutaga ha iya upisina.

An iba pa nga basaranan amo an: korapsyon han ₱615.5 kamilyon ha *confidential funds*, pagsuborno ngan korapsyon ha Department of Education; diri mahieksplikar nga karikuhan ngan kapakyasan nga igdeklara an iya mga pananag-iya ha Statement of Assets, Liabilities, and Net Worth; pagkadabi ha ekstrahudisyal nga pan-matay ha Davao City, mga maniobra nga destabilisasyon, kalakip an iya pagboykot ha SONA ngan pag-ulang ha mga pagbista ha Kongreso; ngan "kabug-usan nga higwaos" komo bise presidente ngan ikaduha nga pinaka-hitaas nga upisyal han nasud.

Iginpadangat ha Senado an igin-endorso nga resolusyon han *impeachment*, nga mayda buruhaton nga bug-uson an korte nga magbibis-ta ha mga reklamo. Kun masenten-syahan, diri la mapapatsik ha pwes-to hi Duterte, mapupugngan liwat hiya nga utro nga dumalagan ha bisan ano nga pusisyon ha masunod nga

mga eleksyon.

An pinakaurhi nga hugna han pingkiay han grupo nga Marcos ngan han mga Duterte tiga-man han pagpintas han sum-pakiay giutan nira. Ginpapakita hini an dugang pa nga paghila-rum han pagkabuhag-buhag ha sakob han mga namumuno nga reaksyunar-yo nga mga klase, diin nag-aaragaw ha mga burukrata-kapitalista nga pribilehiyo ngan poder an mga mag-karibal nga paksyon ngan grupo.

Mayor nga pitad an *impeachment* ha pagkonsolida han grupo nga Marcos ha poder hini ha pulitika, labina ha sakob han militar, pulis ngan depensa. Kadungan hini, ginpadig-on liwat ni Marcos an iya leylatad ha imperyalista nga US pinaagi han du-gang pa nga pagpakusog han pakig-buligay ha US ha mga propaganda nga kontra-China ngan operasyon nga nabal nga gindidiriher han US ha West Philippine Sea, ha tahub han "pagpasulong han soberaniya han Pilipinas."

Malipayon nga ginkarawat han mga Pilipino an *impeachment* ni Sara Duterte komo pasiuna nga pitad para papagbatunon an bise presidente ngan tanggalon hiya ha iya pwesto, komo pitad agud sirutan hiya ha iya mga krimen han korapsyon. Ginkikinahanglan pa nga pakusgon ngan pahiluagon han katawhan an ira mga paggios agud iduso an Senado nga ha gilayon magtirok komo usa nga korte ngan tikangan an pagbista ha pinakamadagmit nga panahon.

Kadaugan han kagiusan masa an *impeachment*, nga dirudiretso ha pagpapakusog han protesta para hini. Dugang hini nga pakukusgon an kaburut-on ngan determinasyon han



katawhan agud sukton hi Marcos mismo ha mas dagko nga krimen han korapsyon ha porma han iya kalugaringon nga *confidential funds*, *pork barrel* ha porma nga ayuda, pagkontrol ha bilyun-bilyon nga pondo han Maharlika Fund ngan pagkuha ha "waray magasto" nga pondo han Philhealth. Kinahanglan liwat papagbatunon hi Marcos ha pagpapabasura niya ha mga nakasalawad nga kaso han kinawat nga karikuhan han iya pamilya nga nabalor hin diri mamenos ha ₱202 kabilyon.

Ha gapil han mga progresibo nga grupo, ginkukulawan nira nga kadaugan an *impeachment* han katawhan nga nakikigbisog para pagbatunon an mga Duterte ngan an ira grupo han mga natalapas ha tawhanon nga katungod. Sering nira, ha pagpursige ngan duruyog nga paggios, pag-insister, ngan pagin mabinantayon han katawhan nakab-ot an pasiuna nga pitad ha pagpapabaton ha korapsyon. Kadungan han panawagan nga sentensyahan nga sala an hi Duterte, ginsusukot liwat nira an rehimen Marcos ha kawaray pulos hini nga batunon an natikagrabeng korapsyon han iya rehimen.

Ha adlaw han borotosay, nagtirok ha atubangan han Kongreso para ipanawagan nga dagmit nga husgaran hi Duterte. Nagkamayda hin pareho nga protesta ha Cabuyao, Laguna.

Pagkaurusa ngan pag-aram komo pagselebraran anibersaryo han Partido ha Cordillera

Ha usa nga prente ha Cordillera, nagresulta an gin-antum nga diri madadayon nga pagsalin-urog han anibersaryo han Partido Komunista ng Pilipinas had-ton Disyembre 26, 2024 ha usa nga pyesta han pagkaurusa ngan pag-aram han mga Pula nga mangaraway ngan masa.

Ludlod ha kakurian an masa ha Barangay Ranyag (Liwanag) nga naa-butan han mga kasama. Bagsak an tinuig nga ani han humay tungod ha grabe nga kathuraw nga ginsundan han parada han mga bagyo nga nanla-surbo ha rehiyon. Nalimitahan liwat an libre nga pagdulhog han masa ha mga sentro nga bungto para makapamalit han ira mga panginahanglan tungod ha pan-gigipit ngan waray wantas nga operasyon han AFP.

Tungod hini, diri malikyan han pira nga kasama nga mabaraka kun tiunan-o hihimuon an selebrasyon. Ano an ira ipapakaon, labi nga nag-imbata hira han mga parag-uma? Sanglit aga han ika-26 han Disyembre, waray na anay magdekorasyon an mga Pula nga mangaraway.

Kundi han kinakulupan, tigda nala nga tinunog an ira *warning device*. Tikang ha kakahuyan, patag-usa nga binutbot an mga taga-Baryo Ranyag.

"Mga kasama, para masieguro an aton seguridad waray na namon kamo pakadtua ha kabablayan. Kami na la an kumadi ha iyo para madayon an selebrasyon han anibersaryo han Partido," paliwanang ni Ka Cesar, an lider han grupo. Kaupod niya an iya asawa ngan anak. Dara nira an dako nga puto han minuron ngan usa kabalde han ginatan nga hulog-hulog. Aada ha likod ni Ka Cesar an iba pa nga taghimaryo nga may dara nga ispageti ngan igсурungo.

Madagmit nga nagdekorasyon ngan iginpadayon han mga kasama an gin-andam nga programa. Ha porma han mga drama, luwa, kanta ngan haglipot nga pamulong, iginladawan nira an natikagrabe nga krisis ha panginabuhin nga gin-aantos han katawhan Pilipino, an natikapintas nga sumpakia y giutan ni Marcos ngan Duterte, ngan an paggamit han imperyalismo

nga US ha bagakolonya hini (kalakip an Pilipinas) para atuhan an China.

Iginladawan nira an paghahadi han mga nasyunal ngan lokal nga dinastiya han mga burukrata-kapitalista ha karikuhan han prubinsya, samtang tinuyo nga ginpapasibay-an nga kulang ha mga pankatilingban nga serbisyo an katawhan. Gindun-an liwat ha mga pasundayag an importansya han pada-yon nga pagpartisipar han masa ha rebolusyon para bag-uhon an ira kamutangan.

"Katugunanan han amon amay nga mayuyuon namon an mga kasama tungod kay kamo an tinuod nga nau-gop ha amon nga mga kabras. Amo ini an katugunanan nga magigin sulundan namon ha amon mga anak ngan apo," estorya ni Dani, usa ha mga tumambong ha selebrasyon. "Maaram kami nga an amon kusog aada ha pagkaurusa ngan duruyog nga paggios."

Waray umuli dayon an taghimaryo kahuman han selebrasyon. Ginhimo nira an asembleya para bug-uson an lokal nga tsapter han Pambansang Katipunan ng mga Magbubukid ngan ginplanuhan an duruyog nga paghulad ha usa nga parte han ira komunal nga katunaan. Ginkaurusan nira kun tiu-

nan-o organisado nga aatuhan an gin-aantum nga atake han operasyon militar ngan pagbalik han RCSP.

Ha sinunod pa nga mga adlaw, magkalain-lain nga ispesyal nga kurso ngan pag-aram ilarum han Padepa (Pambansa-demokratikong Paaralan) an iginlansar ha base han BHB.

Kada adlaw may naabot ha base han mga Hukbo—ngaduha mga kabatan-unan ngan kalagsan. Dinayo an iba para magpabulig ha mga asignatura, an iba para ha simple nga sarusaruay. Ginpabalunan hira han mga mangaraway hin paglaum, kalakip han mga ginukit tikang ha kahoy nga luwag ngan pambayo.

Ha urhi nga adlaw han mga kasama ha lugar, nagtangpos hin batakan nga oryentasyon ha Partido an mga lokal nga aktibista nga gin-organisa ha usa nga sanga han Partido ha lokalidad.

"Mga kasama, hul-os niyo nga naipaklaro an bug-os nga Programa han Partido. Waray kami anuman nga pagruhaduha nga magin kaapi hini," pahayag ni Ka Cesar ha pagtikang han ira pagsumpa ha atubangan han bendera hini.

Ha ira paggikan ha Baryo Ranyag, ginhinumdom han mga kasama an ira mga kabaraka. Hukas-ha-kasingkasing nira nga ginhangkop an mga leksyon han ira eksperyensya: Pirme, ha ngatanan nga higayon, tumapod ha masa. **AB**



Iginduduok han LAB an gerra han katawhan ha mga siyentista ngan inhinyero

Iginselebrar han Liga ng Agham para sa Bayan (LAB) an ika-49 nga anibersaryo hini hadton Disyembre 2024. Ha usa nga sikreto nga katitirok ha National Capital Region, maabot ha 50 nga kaapi hini an nagtirok para magkagdungan nga igselebrar an ira anibersaryo ngan an ika-56 nga anibersaryo han Partido Komunista ng Pilipinas.

Ginbalikan nira ngan iginselebrar an dirudilain nga kadaugan nga nakab-ot han mga tsapter hini ngan ginkahitapo nga mga ayat ha tuig 2024, labina ha panahon han syahan nga tuig han kagiusan nga pagtutul-id. Ginpasidungan liwat han LAB an tanan nga mga rebolusyunaryo nga martir tikang ha sektor han siyensya ngan teknolohiya nga naghalad han ira kinabuhì para ha katawhan ngan ha rebolusyon.

"Nagin landaw an mga kadaugan ha mga kampanya, ha utro nga pagrayhak han pag-oorganisa ha ranggo han batakan nga masa, ngan ha pagpauswag han suporta para ha Bagong Hukbong Bayan (BHB)," sigon ha report han Agham Bayan, mantalaan han LAB. Ha luyo hini, ginpahayag nira nga dako pa an kinahanglan ungbawan nga mga kaluyahan kalakip na an konserbatismo ha pagrekrut han bag-o nga mga kaapi.

Sigon ha editorial han Agham Bayan, "kinahanglan klaro ha aton, komo mga rebolusyunaryo, nga an nangunguna nga katuyuanan naton ha paglansar han kampanya amo an pagbaton ha interes han masa ngan pagpalamo ngan pagpakusog han aton rebolusyunaryo nga pwersa." Yana nga 2025, ginsering han LAB nga dirudiretso hini nga ig-uundong an mga buruhaton agud makabulig ha pagpasulong ngan pagpakusog han rebolusyon Pilipino.

Dugang pa han LAB, ginpakita hini ha ira nga posible nga papel han usa nga siyentista an rebolusyunaryo nga buruhaton nga ipasulong an nasyunal-demokratiko nga rebolusyon nga may sosyalista nga perspektiba, ha mga laboratoryo ngan klasrum ha kasyudaran tubtub ha armado nga pakig-away ha kabaryuhan.

"Igdirudiretso han mga rebolusyunaryo nga siyentista, inhinyero, propesyunal, ngan estudyante an kagiusan nga pagtutul-id agud makab-ot an dugang nga kadaugan," sering hini. Mag-aandam liwat an LAB para ha bulawanon nga anibersaryo hini ha Disyembre.

Biyolohista ha hukbo han katawhan

Usa hi Ka Jerry ha mga rebolusyunaryo nga siyentista nga bumaton ha panawagan nga mag-integreyt ha BHB. Nag-integreyt hiya ha usa nga yunit han hukbo han katawhan ha Luzon. "Para ha akon komo biyolohista, usa nga dako nga oportunidad an pagigin Pula nga mangaraway agud pahilarumon an aton kahibaruan ha saribuhay o *biodiversity* han aton nasud," pasaro niya.

Tikang ha mga lugar nga gin-uukyan, tubtub ha ginkakaon, kada adlaw nga nakakaupod han Pula nga mangaraway an kalibungan. Kasagaran nga aada ha kagugub-an ngan kabukiran an mga yunit han BHB. Danay naman ha mga patag nga erya. Bisan kun dirudilain an kamutangan han mga guba, bukid ngan kapatgan, ha ngatanan nga higayon baga hin mga "field researcher" an mga Pula nga mangaraway ha ira integrasyon ha kalibungan.

Sering niya, "ha kada adlaw nga buruhaton naman ha yunit, nakikit-an naman an dirudilain nga *species*—tanaman, ulaping, mananap, tamsi, ngan iba pa." Agsub liwat kuno kumita an yunit hin mga endemiko o katutubo nga tanaman o hayop sugad han *jade vine*, *corpse flower*, *hornbill* o kalaw, ngan daramo pa nga iba. "Damo kabes liwat nga nahingadto an yunit ha mga lugar nga posible diri pa pisikal nga nakakadtuan han mga siyentista,



bisan hin-o man—diri kita maaram, bangin makadiskubre kita han mga bag-o nga *species* hini nga mga lugar.

Nakakabulig liwat kuno an pagigin maaram ha *biodiversity* para ha panginahanglan ha pagkaon han hukbo han katawhan ngan han masa. "Dirudilain nga *species* an ginpupulsan namon ha buruhaton produksyon. Labina ha mga magkuri nga kamutangan ha mga lugar nga hirayo ha komunidad, malalauman nga surok han pagkaon an *biodiversity* han kagugub-an," asoy niya. Nagpapatuman liwat an yunit han BHB hin mga palisiya agud likyan an pandakop ha mga ginkukunsidera nga *endangered species* o klase han hayop nga nanenelikado na nga mawara.

"Damo an posible mahibaruan ngan madiskubre hiunong ha *biodiversity* han aton nasud, ha konteksto han aton pagpartisipar ha rebolusyunaryo nga pakig-away para ha katawhan Pilipino," sering niya. Dugang pa ni Ka Jerry, pahinumdom liwat ini nga karikuhan para ha iya kun kay ano kinahanglan magpartisipar ha gerra han katawhan—para protektahan an kalibungan ngan katawhan ha pandambong han mga imperyalista ngan lokal nga naghahadi nga klase.

Kagiusan nga pagtutul-id ngan pakigsumpaki ha sayop nga linya

Ha Pebrero 8, igsecelebrar han katawhan Pilipino an ika-86 nga kaadlawan ni Kasamang Jose Maria Sison, tagapangulo nga tagapagtukod han Komite Sentral han Partido Komunista ng Pilipinas (PKP). Duha katuig na an nakalabay tikang han mamatay hi Ka Joma, kundi nagpapabilin pa gihap hiya nga inspirasyon ha mga kabatan-unan ngan bug-os nga katawhan. An nahibilin niya nga baul-karikuhan han mga leksyon ngan pamana kaparte yana ha nagseserbe nga pundasyon ngan giya ha iginpapasulong nga kagiusan nga pagtutul-id han Partido ngan bug-os nga rebolusyunaryo nga kagiusan.

Kalakip hini nga mga leksyon an panginahanglan nga pursigido nga makigsumpaki ha mga kontra-rebolusyunaryo nga ideya, nga nagin landaw ha Syahan ngan Ikaduha nga Dakila nga Kagiusan nga Pagtutul-id (IDKP). Ini an gintagan-duon ni Ka Luis Jalandoni, usa ha namumuno nga upisyal han National Democratic Front of the Philippines ngan maiha nga panahon nga sangkay ni Ka Joma. Gintudlok ni Ka Luis an partikular ngan krusyal nga papel ni Ka Joma ha pagpasulong han IDKP ha pangandam han borador han dokumento nga "Utro nga Padig-unon an Aton mga Batakan nga Prinsipyo ngan Itul-id an mga Pagsasayop."

"Hini nga panahon, damo nga magkalain-lain nga mga ideya an namahot-pahot ha rebolusyunaryo nga kagiusan. Ini nga mga natudlok nga kasaypanan ha dokumento han pagtutul-id, nakaimpluwensya ha panhunahuna ngan ideolohiya han mga kasama," sigon kan Ka Luis. Dugang pa niya, bisan an mga kasama ha Netherlands, kun diin hira nakadistyerro, waray matalwas ha impluwensya hini nga mga sayop nga ideya.

Estorya niya, mayda mga yawe nga lider ngan nangunguna hadto ha organisasyon ha Europa an "nagdadara na han linya ha ideolohiya nga sukwahi ha linya han dokumento han pagtutul-id." Pag-eksplikar pa Ka Luis, para ha ira makuri ura-ura an panahon han panalinguha nga maipaklaro an dokumento nga "Utro nga Padig-unon,"

ngan aghaton an mga kasama ha Netherlands nga santupon an importansya hini.

Iginpasaro liwat niya an kaso han usa nga dati nga kasama nga nagsukuna ha kagiusan nga pagtutul-id basar ha pagkita han iya mga sangkay, imbes nga pag-adman ngan analisaron an dokumento nga gin-gawas han Partido. Dugang pa ni Ka Luis, hini nga panahon linutaw liwat ha Netherlands an bansag nga "kontras" ha mga "rejectionist" o kumontra ha kagiusan nga pagtutul-id.

"Kun waray mahitabo an IDKP, diri ako maaram kun ano an posible nga nahitabo ha aton rebolusyunaryo nga kagiusan," sigon kan Ka Luis. Gintudlok ngan gintul-id han Partido hadton IDKP an mayor nga mga kasaypa-


nan nga ineksister ha kagiusan ha sakob hin damo nga tuig. Kaparte hini nga mga kasaypanan an linya han "estrategiko nga kontra-opensiba" nga sukwahi ha tulo kabalitang han gerra han katawhan. Hadton dekada 1980 ha Mindanao, diri napapanahon nga nagtukod hin dagko nga pormasyon militar nga hinungdan han pagbul-iw ha buruhaton masa ngan nagresulta han dagko nga destroso.

"Imbes nga analisaron kun kay ano nahinugad, an kongklusyon han mga kontras tungod kay mayda mga espiya ha kagiusan (o mga Deep Penetration Agent). Nagresulta ini ha pinakamagpait nga panahon ha aton rebolusyunaryo nga kasaysayan," estorya ni Ka Luis.

Sugad han presente nga kagiusan nga pagtutul-id nga ginlalansar han Komite Sentral, an IDKP ha pinakaubod usa nga kagiusan nga pag-aram. An kakulang ha pan-ideolohiya nga buruhaton ha damo nga tuig nagbunga ha seryoso nga mga pagsasayop.

"Ha katapusan, guti nga porsyento la han rebolusyunaryo nga kagiusan an kumontra ha kagiusan nga pagtutul-id. An nahibilin nagpailarum ha pagtutul-id ha ideolohiya, pulitika ngan organisasyon. Kinusog an BHB. Nag-abre han damo nga prentegerilya han hukbo. Utro naton nga nabawi an pagtapod ha aton han masa," sigon kan Ka Luis.

Estorya ni Ka Luis, puno kaupay hin leksyon an baulkarikuhan nga ginbilin ha aton ni Ka Joma. Tikang ha katukod hini, pagtudlok ha mga kasaypanan, ngan pagpasulong kahuman an mga kagiusan pagtutul-id. "Ha urhi niya nga mensahe ha aton, ginsering niya: Diri mapeperdi an Nasyunal Demokratiko nga Rebolusyon han katawhan Pilipino!"





Protesta ha UP. Sinemana an protesta han mga estudyante ngan magtuturdo han Unibersidad ng Pilipinas (UP) ha magkalain-lain nga kampus hini komo pagtapo ha ikaduha nga semestre hadton Enero. Ginpalandaw ha mga protesta an pag-iban ha badyet, hulga ha seguridad ngan pan-akademiko nga kalibrihan, kaupod liwat an panawagan nga "Duterte Pagbatunon, Marcos Sukton!"

Pinakadako an rali ha UP Los Baños diin masobra 800 an nagpartisipar ha "First Day Rage" hadton Enero 27. Naghimo liwat hin rali ha UP Tacloban hadton Enero 13; UP Manila ngan UP Visayas, hadton Enero 20; UP Baguio, UP Diliman, UP DEPPPO ha Pampanga, ngan UP Cebu hadton Enero 21; ngan UP Mindanao hadton Enero 28.

Paghandum ha Mendiola Masaker. Ginhandum han Kilusang Magbubukid ng Pilipinas (KMP) ngan mga demokratiko nga sektor an ika-38 nga anibersaryo han madugo nga Mendiola Masaker hadton Enero 22. Iginhimo nira an usa nga porum ha Bantayog ng mga Bayani para handumon an 13 nga indibidwal nga namatay kahuman tapuon han pandarahug han mga tauhan han hadto anay presidente Corazon Aquino an yukut-yukot nga nagpoprotesta nga parag-uma. Ginsundan ini han martsa tikadto ha Mendiola han Manila kun diin nahitabo an makangirhat nga krimen.

Protesta kontra ha mahal nga multa ha Cebu. Naglansar hin protesta hadton Enero 25 an mga drayber han dyip ha ilarum han Piston Cebu ha atubangan han LTO Region 7 agud suknaon an pagtarget ha ira agud patukan hin sobra-sobra nga multa. Tumipa an mga drayber ha Joint Administrative Order 2014-01 han ahensya nga nagtalaan hin tubtub ₱27,000 nga multa para ha gudti ngan hinimu-himo nga pagtalapas ha mga pantrapiko nga balaud.

Suporta ngan kumpensasyon, igin-insister han mga Batangueño. Nagpiket ha Department of Social Welfare and Development, Department of Agriculture ngan Sugar Regulatory Administration-Main Office ha Metro Manila an mga magtutubo ngan parag-uma han Batangas hadton Enero 22. Ha pangunguna han Sugar-Batangas ngan Alyansa ng mga Magsasaka para sa Kumpensasyon, ginsukot nira an rehimen Marcos ha pampinansya nga suporta ngan kumpensasyon ha mga apektado han grabe nga kalamidad ngan pagserra han CADPI ha prubinsya.

Mga estudyante ha UE ngan BCP, nagprotesta. Gumios an mga estudyante han University of the East (UE) ngan Bestlink College of the Philippines (BCP) hadton Enero agud suknaon an larang nga paghitaas han matrikula ngan pag-imponer han pakuri nga mga palisiya ha ira eskoylahan. Ha UE, nagpiket ha kampus ha Caloocan ngan Manila hadton Enero 27-28 kadungan han iginlansar nga "konsultasyon" han UE hiunong ha iginduduso han unibersidad nga 5% nga *tuition and other fees increase* (TOFI). Antes hini, duruyog hira nga nagdagkot hin kandila kadungan han paglansar han usa nga halipot nga programa ha UE-Caloocan hadton Enero 24.

Ha BCP, utro nga naglansar hin protesta an mga estudyante ha Quezon City hadton Enero 30 para suknaon an dako nga kapalakan han administrasyon ha iginlansar nga selebrasyon ha anibersaryo han eskoylahan hadton Enero 26 ha Bataan. Gintawag han Anakbayan-BCP ngan mga estudyante hini nga #BCPTortureDay an nasering nga adlaw han selebrasyon tungod ha ura-ura kadamo nga aberiya ngan mahal nga gastos.

Katitirok para ha anibersaryo han PKP, iginlansar ha Rizal

HA MAHUGOT NGA pagbakyang han masa, nahilansar han Bagong Hukbong Bayan (BHB)-Rizal (Narciso Antazo Aramil Command) an selebrasyon han ika-56 nga anibersaryo han Partido Komunista ng Pilipinas ha prubinsya. Tinambong ha katitirok an mga kaapi han Partido ngan mga rebolusyunaryo nga pwersa tikang ha sektor han mga parag-uma, kababayin-an, kabatan-unan-estudyante, trabahador ngan kabras ha syudad. Nahipatuman ini ha butnga han makusog nga operasyon militar ha prente gerilya.

Ha katitirok, iginlansar an pormal nga pag-aram ha pahayag han Komite Sentral para ha anibersaryo diin sumobra 50 katawo tikang ha kabaryuhan ngan kasyudaran an tinambong. Ha diwa han kagiusan nga pagtutul-id, kritikal ngan mapainubsanon nga gintudlok ha pag-aaram an mga naeksister pa gihapon nga kaluyahan nga kinahanglan ungbawan ngaduha ha kagiusan masa ngan armado nga pakig-away.

Naghimo naman hin mga pankultura nga pasundayag an Pulang Bandila han BHB-Rizal ngan an mga tumambong nga rebolusyunaryo nga pwersa. Landaw liwat ha selebrasyon an paghimo han mga arte-biswal han mga mangaraway ngan mga rebolusyunaryo nga pwersa tikang ha kasyudaran hiunong ha tema han pahayag han Partido ngan pagpasulong han kagiusan nga pagtutul-id. Damo ha mga tumambong syahan nga higayon pala nga nakasakob ha yunit han BHB.

Kahuman han ngatanan, naglansar an yunit hin "kapihan" ha tema nga "an papel han kabatan-unan ha kagiusan nga pagtutul-id." Ha sarusaliwan nga pahayag ngan kanta tikang ha mga Pula nga mangaraway ngan rebolusyunaryo nga pwersa, iginpasaro an kamahinungdanon han kagiusan nga pagtutul-id ngan kun tiunan-o ini iginsapraktika han kada tagasa.

Sigon ha mga bisita, nagin pamatuod an aktibidad nga waray pulos an ginsesering han reaksyunaryo nga estado nga natikaluya na an rebolusyunaryo nga kagiusan. Ha paghuman han programa, damo an nagpahayag han karuyagon nga magpabilin agud mag-integreyt ha hukbo han katawhan.

62.7%

o 31.06 kamilyon nga Pilipino nga mayda trabaho an nagpapatuman han simple nga trabaho ngan nakarawat hin pinakahimubo nga kasagaran nga suhol (P387-583/adlaw) hadton Nobyembre 2024.

Taramdan: EILER

9 nga nasud an nagkaurusa ha koalisyon nga **The Hague Group** agud pabatunon an estado han Israel ha mga krimen hini ha gerra ngan krimen kontra ha katawhan. Ginkokomponer ini han **South Africa, Belize, Cuba, Namibia, Bolivia, Honduras, Senegal, Colombia** ngan **Malaysia**.



18

an ginbuhian han Hamas kabalyo han masobra 500 nga Palestino nga priso pulitikal. Kaparte an balyuay han mga priso ha kasarabutan nga ukoy-bubto nga nagtikang hadton Enero 19.



Ika-8

an Davao City ha 500 nga syudad ha bug-os nga kalibutan nga mayda pinakagrabe nga trapik, samtang ika-14 an Manila. Pinakagrabe naman ha Istanbul (Turkey), New York (US) ngan Chicago (US).

Taramdan: Tomtom Traffic Index

24,916

o sumobra katunga han mga pampubliko nga eskoylahan an **waray prinsipal** tungod han malangan nga promosyon han DepEd ha kwalipikado nga mga magtuturdo.

50
NGA OBISPO

an nagpahayag hin pag-ato ha desiyon han Korte Suprema nga nagtutugot ha dagko nga kompaniya nga mangisda ha *municipal waters*. **533 ha 884 nga mga bungto an apektado han desisyon.**

43%

gin-iban ha badyet han Mindanao State University ngan mga kampus hini ha BARMM para ha 2025.

\$2 katrilyon

igindako han karikuhan han mga bilyunaryo ha bug-os nga kalibutan hadton 2024, 3 kapilo nga mas madagmit tanding ha 2023. Ini nga karikuhan diri tikang ha produksyon kundi tikang ha mana, kroniyismo ngan monopolyo nga poder.



Paggamit ha AI kontra ha trabahador nga Pilipino

Ha atubangan han komun nga araba, igintukod hadton Enero 25 han mga trabahador ha BPO (*business process outsourcing*), telekomunikasyon, *delivery driver* ngan iba pa nga trabaho nga ginpapadalagan han mga *digital platform* (o mga sistema nga *online*) an Coalition of Digital Employees-Artificial Intelligence (CODE-AI). Igintukod an nasering nga koalisyon agud magtaglawas ha mga trabahador ngan empleyado ha atubangan han tikhiluag nga paggamit han mga langyaw nga kompaniya han teknolohiya nga AI. Ginkokomponer an CODE-AI han BIEN, Riders Watch, Gabay sa Unyon sa Telekomunikasyon Supervisors-PLDT (GUTS-PLDT), Digital Justice, Computer Professionals Union, May Day Multimedia, ngan Ecumenical Institute for Labor Education and Research.

Sigon ha usa nga pag-aram, 36% o 8.5 kamilyon nga trabaho ha Pilipinas an apektado han paggamit han AI. Tulo kamilyon hini mga trabaho nga klerikal, sobra 2.5 kamilyon ha pagbaligya ngan serbisyo, 500,000 panteknisyan nga trabaho ngan kabakyang nga mga propesyon, ngan 700,000 mga propesyunal nga trabaho. Haros duha ha kada 10 nga trabaho hini nga mga nataran an nakatalaan nga mawara dara han AI.

Ha industriya pala han BPO, 300,000 nga trabaho an ginlalauman nga mawawara ha masunod nga lima katuig tungod ha AI. Ha presente, damo na nga kompaniya ha industriya an nagamit han AI para ha pauru-utro nga klerikal nga trabaho ngan pagbaton ha mga pakiana han mga kliyente. Dugang nga presyur ha mga empleyado nga padagmiton an pagtrabaho gamit an AI bisan kun waray katugbang nga dugang nga suhol ngan benepisyo.

Ano an AI? An AI amo an teknolohiya ha kompyuter nga naghahatag dinhi hin kapas nga subaron an kabaltok han usa nga tawo sugad han pag-intindi han lenggwahe, pagkilala han mga padron, pagsolbar han mga problema ngan paghimo hin mga desisyon. Usa ha mga klase hini amo an gintatawag nga "generative" AI nga may kapas maghimo hin teksto, imahе, musika ngan bidyo tikang ha hiluag nga impormasyon han publiko nga nakadeposito ha internet.

Ginrarakudako han mga digital nga kompaniya, kadungan an reaksyunaryo nga estado han Pilipinas, nga maghihimo hin bag-o nga mga trabaho han AI ha nasud. Kundi, sigon ha CODE AI, diri mababawi han gintatantiya nga 100,000 nga mahihimo nga bag-o nga trabaho han AI an kadamo han trabaho nga mawawara tungod hini. Dugang pa, iginkokonsidera an Pilipinas komo "digital sweatshop." Karuyag sidngon, an

klase han trabaho nga may kalabutan ha AI nga iginpapasa ha mga Pilipino nakapokus ha pauru-utro nga mga buruhaton, sugad han *data annotation* ngan *content moderation* nga ngaduha mga trabaho nga "pantreyning" ha dirudilain nga klase han AI. Himubo an pasuhol hini nga mga trabaho (\$1-\$3/oras), hirayo kun igtatanding ha mga trabahador ha iba nga nasud (\$15 kada oras, kun ha US.) Waray seguridad ha trabaho an mga trabahador dinhi ngan waray hira proteksyon tikang ha pangabuso.

Yana pala, narunapulo kayukot nga mga trabahador ngan propesyunal na ha Pilipinas an nagtatrabaho ha mga langyaw nga kompaniya komo mga "freelancer" han mga *digital* nga kompaniya. Nakikigkumpetisyon hira ha kada tagsa para ha pipirahay nga trabaho nga igintatanyag hini, ha mga *social media platform* sugad han Meta (tag-ya han Facebook ngan Instagram) ngan mga ahensya han langyaw nga estado sugad han US. Darudamo ha ira mga bag-o nga gradweyt nga waray masudlan nga trabaho ha natad nga ira pinag-adman.

Kontrolado an teknolohiya nga AI han pipira nga monopolyo nga kompaniya nga nakabase ha US. Usa ha pinakadako an OpenAI nga naghimo han GPT. May kada iya liwat kalugaringon nga teknolohiya nga AI an mga *social media platform* sugad han Llama han Meta (tag-ya han Facebook ngan Instagram), Gemini han Google ngan Grok han Twitter. Hini nga Pebrero, gumawas an kalugaringon nga modelo nga AI han usa nga kompaniya nga Chinese nga Deepseek.

Diri maididiwara nga ginpapauswag han teknolohiya nga AI an proseso han pagtrabaho, labina ha mga trabaho nga pauru-utro, simple ngan mauyam. Kundi, tungod kay pananagiya ngan kontrolado ini han mga monopolyo kapitalista, diri maididiwara nga gagamiton ini kontra ha mga trabahador labina ha mga atrasado nga nasud sugad han Pilipinas, nga waray gintatagamtaman nga mga katungod.

Pan-gigipit ha sektor han BPO, ginkundena

GINKUNDENA HAN CODE-AI an diri makatadungan nga pagtanggap ha trabaho kan Renso Bajala, tagapagyakan han BIEN, kahuman magpa-interbyu ha usa nga mamamahayag kasumpay han kamutangan han mga trabahador ha mga BPO nga kompaniya nga nagamit han AI. Gintanggap hi Bajala ha basaranan han "palisiya ha social media" han kompaniya nga Concentrix ngan American Express. Talapas an terminasyon ha kalibrihan ha pagpapahayag ni Bajala ngan igkasi niya nga trabahador.

"Mayda kami katungod ha libre nga pagpapahayag ngan asosasyon, ngan yawe an amon pagpartisipar ha mga diskusyon ngan paghimo hin mga palisiya ha paggamit han teknolohiya nga AI agud madepensahan (namon) an katungod han mga trabahador," sigon kan Bajala.

Mga grabe nga pagtamas-tamas ha katungod, nahilista ha Masbate, Cagayan, ngan Davao

Waray wantas an mga pagtalapas ha tawhanon nga katungod han mga pwersa han Armed Forces of the Philippines (AFP) ngan Philippine National Police (PNP) kontra ha katawhan Pilipino ha nakalabay nga mga semana.

Panmusil. Hadton Enero 19, naigo ngan nasamaran ha gutok an 61 anyos nga hadto anay barangay kagawad ngan parag-uma nga hi Marcial Detalo ha waray putas nga panmusil han 2nd IB ha Sityo Balunos, Barangay Rizal, Dimasalang, Masbate. Agud tahuban an ira krimen ngan pagbutang han mga sibilyan ha peligro, malisyoso nga iginpahayag ha midya han 2nd IB nga naigo han bala han Bagong Hukbong Bayan (BHB)-Masbate hi Detalo ha butnga han ginpapagawas nga usa nga engkwentro ha lugar.

Pangaresto. Hadton Enero 7, ginaresto han mga pwersa han estado an 70 anyos nga hi Myrna Cruz-Abraham, beterano nga aktibista, ha San Rafael, Bulacan. Gindakop an biktima basar ha mandamyento de aresto nga iginpagawas han korte ha Cagayan kasumpay han mga kaso han pakyas nga pagpatay ngan pagpatay. Ginreport han mga grupo ha tawhanon katungod nga nakagawas hi Cruz-Abraham kahuman han walo kaadlaw.

"Terrorism financing." Ginsalawdan hin mga hinimu-himo nga kaso han "pagpondo ha terorismo" an lima nga aktibista ha Cagayan Valley.

Ginkasuhan hira Isabelo Adviento, lider parag-uma; Cita Managuelod nga peasant advocate; Agnes Mesina, koordineytor han Makabayan Cagayan Valley; Jackie Valencia, tagadepensa han tawhanon nga katungod; ngan hi Deo Montesclaros, usa nga mamamahayag. Ngatanan hira maiha na nga nag-uundong ha katungod ngan kaupayan han katawhan han Cagayan Valley ngan katawhan Pilipino.

Demolisyon. Ha butnga han pamahuway han mga residente, patraydor nga umatake hadton Enero 29, alas-2 han kaagahon, an 200 nga maton ngan tawuhan han parupanlupot han tuna nga hi Catherine Piñeda ha Dalat/Purok 47, San Roque, Bangkal, Davao City agud ipatuman an demolisyon. Ginruba ngan ginrekisa han mga maton an 20 nga balay ha nasering nga komunidad. Kaparte an panhitabo han serye han demolisyon tikang pa han Disyembre 2024.

Ha Laguna, ginsukna han mga residente an pag-abot hadton Enero 31 han 8-10 katawo nga demolisyon tim ha Barangay Nueva, San Pedro, Laguna para ipatuman an ginhulga nga demolisyon ha ligid han riles. Hadton Enero 7, naghatag hin pahimatngon an Department of Transportation ha mga residente nga palalayason hira hiton nga adlaw ha luyo han kawaray hin "court order" para ha demolisyon.

Piniritay nga pagpasurrender. Nahilista an panibag-o nga serye han militarisasyon ngan pirit nga "pagparehistro" han Philippine Army ha mga parupangisda nga kaapi han Timek La Union ha Barangay San Manuel Norte, Agoo, La Union hadton Enero 20. Nahireport an paglinibot ha nasering nga barangay han pito nga nakasibilyan nga tawuhan han Philippine Army ha pangunguna ni "Captain Fernandez." Dara-dara han mga sundalo an usa nga listahan nga nag-uunod han 30 nga ngaran han presente ngan daan nga mga kaapi han TIMEK La Union ngan ginbibiling hira agud kunuhay "iparehistro" an ira asosasyon.

Ha Masbate, nagtambak hin mga sundalo an AFP ha magkaraknit nga mga barangay han Baang, Sawmill, Barag ngan Mapuyo ha bungto han Mobo, Masbate hadton Enero 27 para lanaton ngan "pasurenderon" an sibilyan nga nagngangaran nga Sony Diamos. AB

Mga protesta para papagbatunon an mga Duterte ngan sukton hi Marcos

NAGTIROK AN MAGKALAIN-LAIN nga demokratiko nga grupo ha Liwasang Bonifacio, Manila hadton Enero 31 para ilansar an protesta kontra ha "3K" o Kilos Bayan laban sa kahirapan, korapsyon at kawalang-pananagutan. Tinambong ha paggios an mga estudyante, magtuturdo, trabahador, propesyunal, mga tawo-han-singbahan, administrador han unibersidad, ngan progresibo nga partido. Ginpangunahan ini han Taumbayan Ayaw sa Magananakaw at Abusado Network Alliance (TAMA NA).

Kapareho nga mga paggios an iginlansar ha Naga City, Cebu City, Iloilo City, ngan Bacolod City ha pangunguna han TAMA NA ngan mga tsapter han Bagong Alyansang Makabayan. Hiton gihap nga adlaw, duha pa nga protesta an iginlansar han iba nga mga grupo, ngaduha ha atubangan han People Power Monument ha EDSA.

Antes hini, iginlansar an pagdagkot han kandila ngan halipot nga protesta hadton Enero 30. Hadton Enero 27, nagprotesta an mga konseho han estudyante, pankampus nga mantalaan ngan grupo han kabatan-unan ha Liwasang Bonifacio ha pangunguna han Leaders and Advocates of the Youth for the Accountability of Sara Duterte (LAYAS Duterte) Network nga igintukod hadton Enero 23.

Hadton Enero 26, nagmartsa an mga magtuturdo ha ilarum han Alliance of Concerned Teachers ha Baguio City para ha sweldo, badyet ha edukasyon ngan baratunon ha kakurian, korapsyon ngan kawaray baratunon han gubyerno. Iginduduso nira an *impeachment* kan Duterte nga sigon ha ira palpak ha pagserbe komo daan nga sekretaryo han Department of Education.

Haton Enero 24, ginpangunahan han Kilusang Mayo Uno an protesta nga "UWIAN Na" para ha suhol ngan kontra ha kawat ha Quezon City. Tumikang an panawagan nga UWIAN Na ha "Unite for Wage Increase at Against Nakaw sa Gubyerno."